

ATENEU DI UDIN**Siet Universitâts par une gnove politiche linguistiche a nivel european**

SI CLAME EUNoM, sigle che par inglès e sta par «Rêt des universitâts europeanis pal multilinguism». Al è un projet european che al smire a definì des liniis vuide par une gnove politiche linguistiche a nivel continentâl di presentâ plui indevant pe sô aprovazion ae Comission europeane. Cheste gnove iniziative e nas in graciis de colaborazion jenfri siet ateneus e centris di ricercje di Belgjiche, Danimarce, Ongarie, Ream Unit, Slovenie, Spagne e Italie: la istituzion vuide e je la Universitat Oberta de Catalunya di Barcelone. Jenfri chestis universitâts che i àn dât vite al projet e je ancje chê dal Friûl: propit a Udin li dal Palaç Antonini, ai 7 e ai 8 di Setembar stâts, si è davuelt il prin apontament par inviâ la discussion jenfri i plui innomenâts esperts di didatiche linguistiche che a varan di puartâ la propue-

ste par une gnove politiche dal insegnament des lenghis ae Comission Ue di Bruxelles.

Il titul de cunvigne, dute incentrade su la maniere miôr par inscuelâ i arlêfs tes fevelis forestis, al è stât «I insegnants di lenghis: viers un gnûf paradigme pe formazion». A inmaneâ l'incuintri e je stade la universitât furlane midiant il so Centri internazionâl sul plurilinguism (Cip) cul patrocini dal ministeri de Istruzion, de Agenzie nazionâl pal svilup de autonomie scolastiche dal Friûl-V.J., de Regjon, dal Comun di Udin, de Fondazione Crup e de Universitât de LiberEtât dal cjâf lûc furlan. «A son stâts metûts in calendari altris apontaments come chest par stabilì une gnove politiche linguistiche a nivel european tratant volte par volte il rapuart jenfri lis lenghis e la ricercje universitarie, la tecnologjie, il marcjât

e vie indevant», nus à dit la professoressa Silvana Schiavi Fachin, rapresentante dal Cip e di agnorums impegnade pe valorizazion de lenghe furlane massime tal mont de scuele. «Il secont incuintri al è in programe ai 18 e 19 di Novembar in Olande te academie de Frisie, mintri che tal Jugn dal an che al ven o larin in Slovenie a Cjaudistrie te universitât dal Litorâl».

Di là des siet universitâts che si son metudis adun par dâi vite, al projet EUNoM a colaborin in dut 38 jenfri ateneus e centris di ricercje di 15 stâts membris de Union europeane plui la Turchie. «EUNoM al larà indevant fin al 2012 cuant che lis istituzions che lu àn promovût a laran devant de Comission Ue cun des propuestis a pro di une moderne politiche linguistiche», e ricuarde Schiavi Fachin. «L'obietif al è chel di frontâ la cuistion des lenghis

cence bacilâ daûr des etichetis classiche tant che, par esempi, lenghis "minoritariis" o "vicinis". Come che al à ricuardât tal so intervent l'innomenât linguist Tullio De Mauro, al è miôr fevelâ di "lenghis in contat": chest parcè che prin di dut – e marche Schiavi Fachin – si à di analizâ la societât li che si vîf in di di vuê stazant la impuartance di ogni fevele. Al è par chest che lis "lenghis dal ambient" come il furlan a àn un compit di fonde tant che imprest par meti in contat lis personis ancje se a vegnin di culturis diversis, dantjur un mieç valit par comunicâ».

Cjapant la peraule al inizi dal incuintri, De Mauro al à ancje ricuardât che la scuele e à di ricognossi e di rinfuartâ la molteplicitât linguistiche de societât li che si cjate a operâ: si trate di una necessitât educative par che la societât dute e sedi pardabon demo-

cratiche e ben disponude ancje a dâi bon acet a cui che al ven di fûr. In plui, tai stâts europeans il concet di monolinguisim nol à plui mutif di jessi: fevelâ come tal Nûfcent di lenghe peade in maniere univoche a une bandiere tal non de unicitât linguistiche di un país al fâs pierdi la vision des societâts dal di di vuê, che simpri plui a cressin te suaze di un fuart interscambi cultural.

«La scuele e à di jessi simpri pronte par rinovâsi: bisugne insegnâ ai fruts cemût imparâ lis lenghis par podê cressi cuntune educazion plurilengâl che e duri dute la vite – e marche Schiavi Fachin –. Chest al è un dai obietifs di fonde dal projet EUNoM, che o vin chê di rivâi ad in plen par une scuele plui moderne cjapant adun ducj i educadôrs dal continent vier».

ALESSIO POTOCO